

Nopa Achtohui Amatajcuiloli cati Pablo Quitajcuilhui Timoteo

Pablo quitajpalo Timoteo

¹ Na niPablo cati niitayolmelajca Jesucristo nimitztitanilía ni amatajcuiloli. Toteco Dios Totemaquixtijca huan Toteco Jesucristo yaya cati ipan timotemachíaj tanahuatijque ma nieli niitayolmelajca huan yeca njchihua ni tequit. ² Noicni Timoteo, nimitztajcuilhuía ni amatajcuiloli. Nimitzicnelía ipan Toteco quej tinonelcone, pampa tijneltocatoc Toteco quej na nijneltoca. Toteco Totata huan Toteco Jesucristo ma quipiyaca hueyi iniyolo ica ta, huan ma mitzta sojtaca huan ma mitzmacaca tasehuilisti ipan moyolo.

Xiquintilquetza cati tamachtíaj cati amo melahuac

³ Timoteo, sempa nimitzilhuía cati nimitzilhui quema nimitzcajte para niyas tali Macedonia. Ximocahua nepa ipan altepet Éfeso huan xiquin-nahuati nopa tacame cati tamachtíaj cati amo melahuac ma ayecmo quichihuaca. ⁴ Xiquinilhui taneltocani nepa ma ayecmo moilhuica ten cuentos ten huejcajquiya cati amo melahuac. Ma amo moilhuica monequi quitemose ajquiya elqui inihuejcapan tatahua huan sintia nopa sequinoc moilhuíaj para elque cuajcualme o amo, pampa

nopa tamanti san quichihuaj para masehualme ma monajnanquilica huan amo teno quisencahuaj. Amo techpalehuía para más ma tijneltocatiyaca Toteco quej yaya quinequi ma tijchihuaca.

⁵ Pero quema tojuanti tiquinmacaj toicnihua tanahuatilme ma quichihuaca, tijchihuaj para tahuel ma teicnelica ica iniyolo cati tapajpactic iixpa Toteco huan para ma quipiyaca iniyolo cati amo quintatelhuía para quipiyaj ome inixayac. Tijnequij para nelía ma quineltocaca Toteco ica nochí iniyolo. ⁶ Sequij tacame quicajtejque ni talnamiqualisti cati achtohui quineltocayayaj. Ama san monajnanquilíaj ica tamanti cati amo ipati. ⁷ Quinequij elise tamachtiani ten itanahuatilhua Moisés para masehualme ma quinhueyitepanitaca, pero amo quimachilíaj taya quijtohuaj, yon taya inintequi itanahuatilhua masque tamachtíaj ica miyac chicahualisti.

⁸ Pero tojuanti tijmatij para cuali itanahuatilhua Moisés sintá masehualme quintequihuíaj quej Toteco quinejqui ma tiquintequihuica. ⁹ Pero Toteco amo quinchijqui nopa tanahuatilme para masehualme cati itztoque xitahuaque iixpa. Toteco quinmacac nopa tanahuatilme para masehualme cati amo tatepanitaj, huan amo quintacaquilíaj cati quipiyaj tequiticayot, huan san quichihuaj cati amo cuali. Itztoque masehualme cati tajtacolchijtinemij huan cati amo teno quineltocaj. Inijuanti ten hueli camanaltij ten Toteco huan quihuejcamajcahuaj nochí cati tatzejtzelotic. Itztoque cati quinmictíaj inintatahua huan cati quinmictíaj

sequinoc masehualme. ¹⁰ Toteco temacac nopa tanahuatilme para masehualme cati quichihuaj ten hueli ica cati amo inintahuical, huan para tacame cati nemij inihuaya tacame, huan sihuame cati nemij inihuaya sihuame para ten hueli quichihuase. Quinmacac nopa tanahuatilme para masehualme cati tachtequij, huan istacatij, huan teilhuíaj cati amo melahuac. Quena, quinmacac nopa tanahuatilme para inijuanti cati quichihuaj miyac tamanti cati nopa xitahuac tamachtili techilhuía ma amo tijchihuaca. ¹¹ Huan nopa xitahuac tamachtili huala ten nopa cuali camanali cati tahuel yejyectzi cati Toteco quicajtejtoc nomaco para ma nijmoyahua. Yaya cati quinamiqui ma tijhueyitalica.

Pablo quitascamatqui Toteco pampa hueyi iyolo

¹² Nijtascamati Tohueyiteco Jesucristo cati nechitac para nitemachtí huan yeca nechmacac ni itequi huan nechmacatoc tetili ma nijchihua. ¹³ Masque yaya cuali quimatiyaya para achtohuiya nicahuilmatiyaya itoca Cristo. Achtohui niquintaijyohuiliyaya imasehualhua huan nelía nimosisiniyaya. Pero masque quej nopa nielqui, Toteco nechtasojtac pampa ayemo nijneltocayaya huan amo nijmachiliyaya cati nijchihuayaya. ¹⁴ Nelía tahuel hueyi iyolo Toteco ica na. Yaya nechmacac nopa taneltoquili huan nopa taicnelijcayot cati tipantíaj quema techtatzquiltia ipan Cristo Jesús.

¹⁵ Nelía temachti ni camanali cati nimechilhuis huan monequi nochí quineltocase: Jesu-

cristo hualajqui ipan ni taltipacti para quintajta-colquixtis tajtacolchihuani huan na achi más nitajtacolchijtoya ten nochis sequinoc masehualme.

¹⁶ Yeca Toteco nechtasojtac pampa Jesucristo quinejqui nechtalis quej se tacat cati ica quinextia hasta canque ontami para quipiya iyolo ica tajtacolchihuani cati nelpano tajtacolchijtoque. Huan yeca ama sequinoc masehualme quimachilise para nojquiya huelis quinelto case Jesucristo huan quiselise nemilisti para nochipa. ¹⁷ Huajca ma tijhueyitepanitaca Toteco, yaya nopa Tanahuati-jquet cati tanahuatis para nochipa huan amo quema tamis. Quena, ma tijhueyimatica yaya cati amo quema miqui, huan cati amo aqui hueli quiita, pampa san yaya Dios huan quipiya nochit alnamiquili. Quej nopa ma eli.

¹⁸ Timoteo, nocone, ni tanahuatili nimitzmaca. Ximoneltali huan xitatehui chicahuac ica cati amo cuali quej nopa tajtolpanextiani quijito que tijchihuasquia. ¹⁹ Xisenhuiquili xijneltoca icamanal Toteco ica moyolo tapajpactic iixpa quej ya tijmati tijchihuas. Sequij masehualme quiixpanotoque cati quimatij para xitahuac huan quisosoloj que inintaneltoquilis. ²⁰ Himeneo huan Alejandro itztoque ome cati quej nopa quichijtoque. Niquinquixti ten campa taneltocani huan niquintemac-tilijtoc imaco Amocuallatacat para ma quimatica para amo hueli camanaltise ten hueli ten Toteco.

2

*Quenicatza monequi ma timotatajtica ica
Toteco*

¹ Timoteo, achtohui nimitztajtanía chicahuac para nochí amojuanti ximotatajtica ica Toteco por nochí masehualme. Xijtajtanica Toteco ma quintiochihua huan ma quintasojta. Xijtajtanica ma quinmaca ten ica panose huan xijtascamatica Toteco por sese injuanti. ² Xijtajtanica Toteco por tanahuatiani huan nochí catí quihuicaj tequiticayot para injuanti ma tequitica cuali huan huelis tiitztose ica cuali huan ica tasehuilisti. Huan quej nopa huelis tijtoquilise Toteco huan sequinoc techtepanitase. ³ Toteco yaya Totemaquixtijca quipactía ma timotatajtica por sequinoc quej nopa, ⁴ pampa yaya quinequi nochí masehualme ma momaquixtica huan ma quimatica catí nelía melahuac.

⁵ Pampa itztoc san se Dios.

Itztoc setzi catí motajcoquetza tatajco Dios huan masehualme para quinyoltalis se ica seyoc, huan yaya Jesucristo catí mocuetqui masehuali.

⁶ Jesucristo motemamac huan mijqui por nochí masehualme para taxtahuas catí monequiyaya huan para techtojtomás ten totajtacolhua.

Huan quema ajsic tonali Toteco technextili nochí catí quichijtoya.

⁷ Huan yeca Toteco nechtequitalijtoc na para nielis niitayolmelajca. Nechtequimamac ma nitepohuili icamanal huan para ma niquinmachtí masehualme catí amo israelitame para ma quineltocaca huan ma quimatica catí melahuac. Nimitzilhuía catí xitahuac huan amo niistacati.

⁸ Huajca quema mosentilíaj taneltocani campa hueli, nijnequi para tacame ma motatajtica. Pero

quema quitananaj inimax para motatajtise ma itztoca tatzejzeloltique iixpa Toteco. Ma amo quipiyaca cualanti, yon tanajnanquilisti ipan iniyolo.

⁹ Huan nijnequi sihuame ma moyoyontica huan ma mocualnextica quej quinamiqui para sequinoc ma quintepanitaca. Ma amo mocualnextica ica miyac oro, huan perlas, huan yoyomit cati tahuel patiyo para masehualme ma quintachilica. ¹⁰ Achi cuali ma quinitaca sihua taneltocani para yejyectzitz pampa quichihuaj miyac tamanti cati cuali quej quinamiqui sihuame cati quineltocaj Toteco.

¹¹ Ipan tasentili nopa sihuame ma quitacaquila ica nopa tamachtili huan ma quiselica ica noch i niyolo. ¹² Amo niquincahuilía sihuame ma quipiyaca nopa tequit para quinmachtise tacame ipan tasentilisti, yon para quipiyase tequiticayot ica tacame. Ma san tacaquica. ¹³ Pampa Toteco quichijqui Adán achtohui huan teipa quichijqui Eva. ¹⁴ Huan Amocualtacat quicajcaya jqui Eva huan yaya tajtacolchijqui. Amo quicajcaya jqui Adán. ¹⁵ Pero Toteco quinmaquixtis sihuame ica nopa conet cati quichijqui ma tacati sinta inijuanti quinelto case huan teicnelise huan quipiyase ininemilis cati tatzejzeloltic huan inintalnamiquilis cati cuali.

3

Xiquintequitali cuali tacame para quinyacanase taneltocani

¹ Nimitzilhuis se camanali cati temachti. Sinta se tacat quinequi mochihuas se huehue tanelto-caquet para tayacanas ipan tasentilisti, huajca quinequi se cuali tequit. ² Pero monequi se tay-acanquet ten taneltocani ma eli se tacat cati amo aqui quitelhuis. Monequi ma quiyiya setzi isihua huan san itztos ica ya. Monequi ma eli se tacat cati cuali monahuatía huan cati quitamichihua itequi. Ma eli se tacat cati nochí quitepanitaj, huan cati quipactía quinselis paxalohuani ipan ichaj huan cati nelía cuali tamachtía icamanal Toteco. ³ Monequi se tacat cati amo quema moi-huintía, yon amo mosisinía. Monequi se cati nelía quiyiya iyolo ica masehualme huan amo quitemo-hua cualanti. Monequi se cati amo quinequi tomi cati amo iaxca. ⁴ Xijtequitali se tacat cati cuali quinyacana nochí ipan ichaj huan cati quinpiya iconehua cati quitacaquilía icamanal huan nelía quitepanitaj. ⁵ Pampa se tacat cati amo quimati quenicatza tayacanas ipan ichaj, ¿quenicatza huelis quinmocuitahuis taneltocani ipan itiopa Toteco? ⁶ Amo xijtequitalica se tacat para elis se tayacan-quet sinta yancuic quineltocatoc Toteco, pampa huelis mohueyimatis quej quichijqui Amocual-tacat. Quej nopa quiselis se tatzacuiltyli quej yaya quiseli. ⁷ Nojquiya monequi xijtali se hue-hue tanelto-caquet cati quitepanitaj nochí mase-hualme hasta cati amo quineltocaj Toteco. Quej nopa amo aqui huelis quitelhuis ica se tamanti cati amo cuali huan nopa Amocualtacat amo quicajcayahuas.

Tapalehuiani ipan tiopamit ten taneltocani

⁸ Nojquiya nopa tacame cati quinequij mochihuase tapalehuiani ipan tiopamit ten taneltocani monequi elise tacame cati nochí quintepanitaj. Xiquintequitali tacame cati amo quipiyaj ome inixayac, huan cati amo quema moihuintíaj huan cati amo tahuel quinequij tomi cati amo iaxca. ⁹ Xiquintalica tacame cati tapajpactic inintalnamiquilis huan cati senquisa quinelto-caj nopa tamachtili ten Jesucristo cati amo aqui quimatiyaya hasta Toteco technextili. ¹⁰ Pero quema ayemo tiquintalijtoc quej tapalehuiani, monequi xiquinmacaca seyoc tequit ipan tasen-tilsti para tiquinyejyecos sinta quichihuase cuali nopa tequit iniixpa nochí o amo. Sinta, quena, cuali quichihuase, huajca xiquintequitalica quej tapalehuiani. ¹¹ Huan nojquiya nopa sihuame monequi elise cuali sihuame cati nochí quintepanitaj. Ma amo elica sihuame cati teejel-namiquij. Monequi ma elica sihuame cati cuali monahuatíaj huan cati itztoque temachme ipan nochí tamanti. ¹² Monequi sese taca tapalehuij-quet ipan tiopamit ma quipiya setzi isihua huan san itztos ica ya. Monequi taca tapalehuiani ma elica tacame cati cuali quimocuitahuíaj inchaj huan cati quinyacana iconehua ica cuali. ¹³ Pampa se tacat cati quichihuas nelía cuali ni tequit ten tapalehuiani ipan tiopamit, quiselis más tatepanitacayot huan noja más mochihuas temachti para quinpalehuis sequinoc ma quinel-tocaca Jesucristo.

Cati tojuanti tijneltocaj

¹⁴ Nimitztajcuilhuía ama masque nijnequi amo huejcahuas para nimechitati. ¹⁵ Pero sinta amo hueli niyas nimantzi, nijnequi nimechmachiltis quenicatza monequi taneltocani ma mochihuaca ipan ifamilia Toteco. Pampa nopa taneltocani cati mosentilíaj, inijuanti itiopa Toteco cati yoltoc huan eltoc quej taquetzalme cati quiijyohuíaj nopa cati melahuac. ¹⁶ Nochi quimatiј para nelía hueyi nopa cati Toteco technextili para ma tij-machilica ten ya:

Cristo mochijqui masehuali huan monexti campa tojuanti.

Itonal Toteco technextili para yaya elqui xitahuac iixpa Toteco.

Ilhuicac ehuani quiitaque.

Huan taneltocani quinilhuijque miyac masehualme ipan campa hueli tali ten ya.

Miyac masehualme ipan ni taltipacti quinelto-caque.

Huan teipa Toteco sempa quitejcolti huan quiseli ipan ilhuicac.

4

Sequij tacame quicahuase Jesucristo para quito-quilise sequinoc tamachtilli

¹ Itonal Toteco techyolmelajtoc xitahuac para ipan nopa itamiya tonali sequij tacame quicahuase cati tijneltocaj. Quintacaquilise ajacame ten Amocualtacat cati san tacajcayahuaj huan quiselise inintamachtil. ² Ni tamachtiani san quipiyaj ome inixayac huan istacatij. Huan pampa quipiyaj iniyolo mictoc, ayecmo teno

moilhuíaj quema quichihuaj cati amo cuali.
³ Quijtohuaj para se taneltocaquet amo hueli quipiyas itahuical. Quijtohuaj ayecmo huelis tijcuase sequij tamanti tacualisti. Pero Toteco quichijtoc nopa tacualisti para tojuanti cati tijneltocaj Toteco huan tijmatij cati melahuac ma tijcuaca ica tascamatili. ⁴ Pampa nochí tacualisti cati Toteco quichijtoc eltoc cuali huan yon se amo monequi tijhuejcamajcahuase. Huelis tijtascamatise Toteco huan tijselise nochí, ⁵ pampa Icamanal Toteco quiijtohua yaya quitiochihuas huan quitatzejzelolchihuas totacualis quema tijtascamatij.

Se cuali tatequipanojquet ten Jesucristo

⁶ Xiquinmachtí taneltocani nepa ni tamanti cati nimitzilhuijtoc, huan quej nopa tielis se cuali itequipanojca Jesucristo. Huan se cuali tequipanojquet monequi momachtis nopa camanali cati quineltoca. Quena, motamacas ica nopa cuali tamachtili cati quitoquilía quej elisquía itacualis. ⁷ Amo xijtacaquili huihui camanali huan camanali cati amo ipati cati camanaltij sequij tename, pero xijtequihui monemilis huan mochicahualis para más timocualchijchihuas ipan Toteco. ⁸ Sinta tijcualchijchihuas motacayo, cualtitoc. Pero más ipati sinta timocualchijchihuas ipan Toteco, pampa mitzpalehuis para nochipa. Ipati ama quema tiitztoque ipan ni taltipacti huan achi más ipati elis teipa quema tiitztose ilhuicac. ⁹ Temachtí ni camanali cati nimitzilhuijtoc huan quinamiqui para nochí masehualme ma quiselica. ¹⁰ Huan

ye ca tojuanti chicahuac titequipanojtinemij huan titaijyohuijtinemij pampa tijnequij timochixtose ipan yaya Toteco cati yoltoc huan cati amo quema miqui. Yaya inintemaquixtijca nochimasehualme huan quinmaquixtis para nochipa nochia cati quineltocaj.

¹¹ Xiquinmachti nopa taneltocani nochia cati nimitzilhuijtoc huan xiquinnahuati ma quichihuaca. ¹² Ma amo aqui quiijto para amo mitzta-caquilis pampa noja titelpoca tacat. Pero xiquinc-ahuili taneltocani se cuali ejemplo ica cati titamachtia huan ica cati tijchihua. Xiquinnextili quenicatzia ma teicnelica huan ma quineltocaca Toteco ica nochia iniyolo huan quenicatzia ma quipiyaca ininemilis cati tapajpactic. ¹³ Hasta quema niajsiti nepa, ya ni monequi xijchijtiya quema anmosentilíaj: Xijpohua Icamanal Toteco para nochia quicaquise. Xiquinmachti cati quiijtosnequi. Huan xiquinyolchicahua taneltocani ma quichihuaca cati quiijtohua. ¹⁴ Xijtequihui nopa yajatili cati Toteco mitzmacac quema nopa huehue taneltocani quitalijque inimax ipan motzon-teco huan Toteco quinmacac camanali para camanaltise ten nochia nopa cuali tequit cati tijchihuasquía teipa.

¹⁵ Ica nochia moyolo xijchijtinemi nochia ni tamanti cati nimitzilhuijtoc. San ya nopa xijmati para nochia taneltocani quiitase para mojmosta tijchihua más cuali itequi Toteco. ¹⁶ Ximotachili para san cati xitahuac tijchihuas huan para san cati cuali titamachtis. Ximotatzquili san ipan ya ni. Sinta quej ni tijchihuas, Toteco mitzmaquixtis ta huan injuanti cati mitztacaquilise.

5

Quenicatza monequi Timoteo ma nemi iniiuxpa taneltocani

¹ Amo xicajhua se tacat cati ya huehue quema quichihua cati amo cuali. Achi cuali xijnojnotza ica cuali quej elisquía motata. Huan cati san cuali chicaj tacame, xiquinnojnotza quej elisquíaj moicnihua. ² Xiquincamanalhui sihuame cati tename quej elisquíaj monanahua huan chicaj sihuame quej elisquíaj mosihua icnihua. Huan quema tiquincamanalhuía, xijpiya motalnamiquilis tapajpactic.

³ Monequi taneltocani quinmocuitahuise nochí sihuame icnotzitzi cati ya mijque inihuehue huan cati amo aqui quipiyaj para quinpalehuis. ⁴ Pero sinta se toahui cati icnotzi quinpiya iconehua o iixhuihua cati ya huejhueyi para quipalehuise, huajca monequi ma quipalehuica. Monequi iconehua quiitase para Toteco quintequimacatoc achtohui ma quichihuaca cati cuali ica inintatahua o cati itztoque inihuicalhua. Quena, monequi quicuepilise cati yejectzi inintatahua quinchihuilijque quema quiniscaltijque, pampa Toteco quipactía quema se quinmocuitahuía itatahua. ⁵ Pero ica sihuame cati mijque inihuehue huan cati nelía itztoque ininpilse ltitzitzi huan amo aqui quipiyaj, huajca monequi xiquinpalehuica. Inijuanti san mochiyaj ipan Toteco huan motatajtíaj huan quitajtaníaj ten ica panose tonaya huan tayohua. ⁶ Pero sequinoc sihuame cati mijque inihuehue san quitemhua jcati quipactía inintacayo.

Masque yoltoque, Toteco quinita quej cati ya mictoque. ⁷ Xiquinnahuati taneltocani ma quichihuaca nochi ya ni para amo aqui huelis quinejelnamiquis para amo quinpalehuíaj cuali sihuame cati icnotzitzi o para quinpalehuíaj sihuame cati amo nemij cuali. ⁸ Pero sinta se amo quinequi quimacas itata, o inana, o sequinoc ihuicalhua ten ica panose, huajca ica ya nopa quinextía para amo quineltoca Toteco. Huan quichijtoc más fiero que se tacat cati amo quema quineltocatoc Toteco.

⁹ Amantzi nimitzilhuis catijke sihuame icnotzitzi anquintapejpenise huan anquinijcuilose ipan tiopa. San xiquintapejpenica sihuame icnotzitzi cati ya quipiyaj sesenta xihuit huan cati nochipa itztoyaj san ica setzi inihuehue, ¹⁰ huan cati nochи taneltocani quimatij para quichijtinentoque cati cuali. Quena, xiquinijcuilo toahuihua cati cuali quiniscaltijtoque ininconehua huan cati ica paquillisti quinselíaj paxalohuani. Monequi xiquinijcuilo cati quinpajpaquilijtoque iniicxihua taneltocani o ten hueli tamanti tequit cati monequi. Xiquintapejpeni cati amo quema mohueyimatij huan cati quimatque quinpalehuíaj cati taijyohuíaj. Quena, xiquintapejpeni nopa sihuame icnotzitzi cati ica nochи iniyolo quichijtoque cati cuali.

¹¹ Pero sihuame icnotzitzi cati ayemo quipiyaj sesenta xihuit amo xiquinijcuiloca ipan tiopamit, pampa cati inintacayo quinequi, quiniyocatalis ten itequi Toteco huan sempa quinequisse monamictise. ¹² Huan quej nopa Toteco quintatzacuiltis pampa amo quichijque cati quitajtolcajque para

quichihuase quema moijcuilojque ipan tiopa. ¹³ Nojquiya huelis nopa sihuame cati icnotzitzi cati amo más quipiyaj xihuit pehuase calnemise huan pehuase motatzcanequise. Nojquiya huelis teelnamiquise, huan tatzintocatinemise cati amo monequi. Huan quej nopa camanaltise cati amo quinamiqui quijtose. ¹⁴ Huajca nijnequi sihuame icnotzitzi cati amo más quipiyaj xihuit ma sempa monamictica huan ma quipiyaca más inincone-hua. Nijnequi cuali ma quimocuitahuica ininchaj. Amo teno ma quichihuaca cati ica tocualancaitaca huelis quintatelhuis. ¹⁵ Pampa sequij sihuame icnotzitzi ya quicajtejtoque Toteco huan quito-quilíaj Amocualtacat.

¹⁶ Nojquiya sinta se sihuat o se tacat cati quineltoca Toteco quinpiya sihuame icnotzitzi cati quinita quej iteixmatcahua, monequi quinpalehuis huan amo quincahuas para nopa tiopamit ten taneltocani ma quinpalehuica. Quej nopa, taneltocani huelise quinpalehuise san nopa sihuame icnotzitzi cati nelia amo aqui quipiyaj.

¹⁷ Monequi nochí toicnihua ma quintepanitaca nopa huehue taneltocani cati tayacanaj ipan tiopamit sinta tequitij cuali. Huan monequi ma quintaxtahuica cuali. Pero achi más ma quintepanitaca huan ma quintaxtahuica nopa taya-canani cati ica nochí ininchicahualis tepohuilíaj huan tamachtíaj Icamanal Toteco, ¹⁸ pampa Icamanal Toteco quijtohua: “Amo xijcamailpi nopa toro cati ipan moquejquetza trigo para quiyolquixtis.” Huan nojquiya quijtohua: “Quema se tacat tequiti, monequi quiselis itaxtahuil.”

19 Amo xijtacaquili se masehuali cati quitatelhuía se huehue tacat cati quinyacana taneltocani. Pero sintia ome o eyi quitatelhuíaj, huajca quena, xiquintacaquili. **20** Huan sintia se huehue tacat quisenhuiquilía tajtacolchihua, xijtatelhuica iniixpa nochia taneltocani para sequinoc quiimacasse tajtacolchihuase. **21** Timoteo, nimitznahuatía iixpa Toteco Dios, huan iixpa Jesucristo, huan iniixpa iilhuicac ejcahua cati quintapejpenijtoque para iniaxcahua, xijchihua ni tamanti cati nimitzilhuijtoc iniixpa nochia taneltocani huan amo xiquinchicoicneli huehue taneltocani cati mo-huampoyohua. **22** Amo xijtali momax ipan se tacat nimantzi para tijtequimacas quej se huehue taneltocaquet cati tayacanas. Pampa sintia tijtalis momax ipan itzonteco para tijtequitalis se tacat huan teipa tajtacolchihuas, huajca motajtacol nojquiya pampa amo tijpixqui tamocuitahuili achto-hui ajquiya tijtequitali. Huajca ximotachili para tijchihuas cati nelia cuali huan amo titajtacolchihuas.

23 Nojquiya nimitzyolmelahuas ten moihti huan nopa cocolisti cati tijpiya talojtzitzi. Ayecmo xiqui san at, nojquiya xiqui quentzi xocomeca at para timochicahuas.

24 Huan ica tacame cati tiqquintapejpenía, xiquelnamiqui para itztoque sequij tacame cati tanemijya nesi inintajtacolhua huan nochia quimatij Toteco quintajtolsencahuas. Pero itztoque sequinoc tacame cati amo nesi inintajtacolhua hasta miyac tonali teipa huan huajca quena, nochia quimatise. **25** San se ica se cuali tequit cati quichihuaj masehualme.

Sequij tamanti tequit nimantzi nesi para cati quichijqui quisencajqui se cuali tequit huan nochí quimati. Pero itztoque sequinoc masehualme cati quichihuaj se cuali tequit huan amo nesi nimantzi, pero teipa quena, nesis inintequi cati cuali pampa amo hueli huejcahuas motatijtoc. Huajca xijpiya tamocuitahuili para tijtachilis ajquiya inijuanti tiquintalis para tayacanase.

6

¹ Toicnihua cati itztoque tatequipanohuani cati inintecohua quincojtoque para iniaxca monequi quintepanitase inintecohua ipan taltipacti para amo aqui huelis quitaijilhuis Toteco huan itamachtil. ² Huan sinta toicnihua cati tatequipanohuani quipiyaj ininteco cati nojquiya quineltocaj Toteco, ma amo quicahuaca quintepanitaj. Monequi achi más cuali ma quintequipanoca pampa ininteco nojquiya eli iniienci ipan Jesucristo. Huan inintequi cati cuali cati nopa tatequipanohuani quichihuaj quipalehuis se taneltocaquet cati Toteco quiicnelía. Huajca Timoteo, xiquinmachtijtinemi huan xiquincamanalhuijinemi ten ni tamachtili.

Quenicatza paquise taneltocani

³ Sinta itztoc se masehuali cati tamachtía seyoc tamanti cati amo quej ni cuali tamachtili ten Tohueyiteco Jesucristo, huajca amo xitahuac ica-manal, pampa ni tamachtili techpalehuía ma tipiyaca tonemilis más quej Toteco. ⁴ Huan se cati tamachtía seyoc tamanti san mohueyimati huan amo teno quimati. San quipactía tanajnan-quilis huan tecamaijixnamiquis ica cati quinequi

quiijtos sesen pilcamanaltzitzí cati masehualme quiijtohuaj. Quej nopa masehualme pehuaj mochicoitaj, huan moiyoquixtíaj, huan quintaijilhuíaj sequinoc, huanmoilhuíaj ne sequinoc tajtacolchijtoque. ⁵ Ni tamachtiani nochipa quichihuaj para ma onca tatehuilisti ica inihuihui camanal cati huala ipan inintalnamiquilis cati nempolijtoc. Amo quiijtohuaj cati melahuac. Mochihuaj quej quitoquilíaj Toteco icamanal, pero san quinequij quitanise miyac tomi. Huajca xiquincajtehua nopa tamachtiani.

⁶ Pero sinta tojuanti nelía tijtoquilíaj Toteco icamanal huan tipaquij ica cati tijpiyaj, tijtan-toque miyac. Quena, tiitztoque quej tominpiyani. ⁷ Pampa amo teno tijhualicaque ipan ni taltipacti quema titacatque huan temachti amo teno tijhuicase quema timiquise. ⁸ Huajca sinta tijpiyaj ten tijcuase huan ten timoquentise, ma tipaquica, ⁹ pampa masehualme cati tahuel quinequij miyac tomi, nimantzi huetzise, pampa tajtacoli quinyoltianas. Eltoc quej se taquetzti cati quinmasiltíá. Huan inijuanti pehuase quinequise más tamantzitzí cati quinchihuas cati fiero para inijuanti. Huan ya nopa quinhuicas ipan se ojti cati quinempolos ininemilis huan teipa hasta polihuise. ¹⁰ Miyac tamanti tajtacoli pehua quema se masehuali quiicnelía tomi huan mojmosta quinequi quipiyas más. Sequij cati nelía quinequiyayaj tomi ya quicajtejtoque quineltocaj Toteco huan yeca quipantijtoque miyac tacua-jcualoli.

Xielí quej se cuali soldado

¹¹ Pero ta Timoteo, ta tise tacat cati tiaaxca Toteco. Huajca xijtalcahui nochí cati amo cuali quej ya nimitzilhui. Huan xijtoquili cati xitahuac. Mojmosta xiitzto más quej Toteco. Más xijneltoca ya huan más xiquinicneli mohuampoyohua. Mojmosta xisentoquili motequi huan xijpiya moyolo ica nochí masehualme. ¹² Ximoneltali para titatehuis ica cati amo cuali quej quichihua se cuali soldado. Quena, tiitztoque ipan se tatehuilisti para ma mocahua senquisa xitahuac totaneltoquilis huan para más masehualme ma quicaquica huan ma quineltocaca. Ximoaxcati nopa nemilisti para nochipa cati Toteco mitzmacatoc. Tiquijto iniixpa miyac masehualme quenicatza tijneltoca Jesús; huajca amo quema xijcahua. ¹³ Timoteo, nimitznahuatía iixpa Totata cati quinmaca nemilisti nochí tamanti cati itztoque huan iixpa Cristo Jesús cati quiilhui Poncio Pilato cati melahuac quema itztoya iixpa, ¹⁴ xiquinchihua nochí ni tanahuatilme cati nimitzilhuijtoc ica moyolo senquisa tapajpactic para amo aqui huelis mitztelehuis pampa tijpatatoc nopa tamachtili. Huan quej nopa xijchijtiya hasta monextis Jesucristo quema sempa hualas. ¹⁵ Pampa quema ajsis nopa tonali cati cuali, Toteco Dios quiilhuis Tohueyiteco Jesucristo ma sempa huala ten ilhuicac. Pampa Toteco Dios quinahuatía nochí cati onca huan yaya cati quinamiqui tijhueyitalise. Yaya nopa Tanahuatijquet cati quinnahuatía nochí tanahuatiani ipan taltipacti huan yaya ininteco nochí tetecome. ¹⁶ San yaya quipiya nemilisti para nochipa ipan ya. Yaya itztoc ipan nopa taahuili cati tahuel cahuani hasta amo aqui huelis monechcahuis.

Amo aqui se masehuali cati quiitztoc Toteco Tota huan amo aqui hueli quiita. Ma tijnextilica nochi tatepanitacayot pampa yaya quipiya nochi tanahuatili huan quipiyas para nochipa. Quej nopa ma eli.

¹⁷ Xiquinilhui taneltocani cati quipiyaj miyac tomi nica ipan ni taltipacti, ma amo mohueymatica huan ma amo motemachica ipan inintomi pampa nimantzi huelis quipolose nochi. Xiquinilhui ma motemachica ipan Toteco cati itztoque huan techmaca nochi cati onca para ma tipactoca huan techmaca hasta mocahua. ¹⁸ Xiquinilhui cati tominpiyaj amo san ma quipiyaca miyac tomi, pero nojquiya ma quichihuaca miyac tamanti cati cuali. Ma amo mochihuaca itzcuiime, pero ica paquillisti ma quintemoca masehualme cati amo quipiyaj tomi para quinpalehuise. ¹⁹ Quej ni quema noja itztoque nica quitantiyase miyac tatancayot cati Toteco quiajociyas nepa ilhuicac huan se tonali quinmacas. Quej nopa quipantise nopa nemilisti cati nelnelía cuali.

Cati monequi quichihuas Timoteo

²⁰ Ta Timoteo, xijmocuitahui nopa tamachtli cati Toteco mitzmacac pampa motemachi ipan ta. Xiquincajtehua nopa tacame cati monajnanquiláj huan camanaltij ten cati amo cuali huan cati amo ipati. Quena, xiquincahua nopa tamachtiani cati quijtohuaj quimatiij nochi, pero amo neli, pampa huihuitique. ²¹ Sequij masehualme quitoquili-jque inintamachtil huan quicajtoque cati quinel-tocayabaj. Timoteo, Toteco ma quipiya hueyi iyolo ica ta. Quej nopa ma eli.

**Icamanal toteco; Santa Biblia
Bible without Deuterocanon in Nahuatl, Huasteca
Central (MX:nch:Nahuatl, Huasteca Central)**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c565d9f9-d202-544b-b78a-3c93df26508e